

दिनांक 08.11.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी उत्तर-प्रदेश मांय बनारस रेलवे स्टेशन ऊं चार नुवी वंदे भारत एक्सप्रेस रेलगाड़ियां रवाना कीनी-कह्यो-वंदे भारत अर अमृत भारत सरीखी गाड़ियां रेलवे री आवती पीढ़ी री बुनियाद रख रही है।
- संसद रो सिंयाळू सत्र 1 दिसम्बर ऊं सरू व्हेला-19 दिसम्बर ताई जनता रा भला रा मुद्दां माथे चर्चा करी जावेला।
- चिकित्सा मंत्री गजेंद्र सिंह खीवसर जैसलमेर मांय नुवा बणायी ज्या मेडिकल कॉलेज रो दौरा कीनो-कह्यो के कॉलेज मांय बेगी ई कक्षावां सरू व्हेला।
- अंता विधानसभा उपचुनाव सारू प्रचार रो काल आखिरी दिन-उम्मीदवार पूरो ज़ोर लगायो।

000

प्रधानमंत्री नरेन्द्र मोदी कह्यो है के वंदे भारत, नमो भारत अर अमृत भारत रेलगाड़ियां देश मांय रेलों री आगली पीढ़ी री बुनियाद रख रही है। वे कह्यो के आज देश रा न्यारा-न्यारा हलकां मांय वंदे भारत रेलगाड़ियां री सरूआत व्हे रही है। श्री मोदी उत्तर-प्रदेश मांय बनारस रेलवे स्टेशन ऊं काशी-खजुराहो वंदे भारत, फिरोजपुर-दिल्ली वंदे भारत, लखनऊ-सहारनपुर वंदे भारत अर एर्नाकुलम-बेंगलुरु वंदे भारत गाड़ियां ने हरी झंडी बता र रवाना कीनी। आं चार नुवी गाड़ियां सागे अब देश मांय 160 ऊं बत्ती वंदे भारत गाड़ियां चालण लागी है।

-----

प्रधानमंत्री कह्यो के विकसित देशां मांय बुनियादी ढांचा रो विकास वां री माली बधोतरी मांय खास काम कीनो है।

000

संसद रो सिंयाळू सत्र 1 ऊं 19 दिसम्बर ताई राख्यो जावेला। संसदीय कार्य मंत्री किरें रिजिजू आ जाणकारी दीनी। श्री रिजिजू कह्यो के सरकार लोकतंत्र ने मज़बूत बणावण अर जनता री उम्मीदां माथे खरो उतरण वाळा रचनात्मक अर सार्थक सत्र री उम्मीद राखे है।

000

प्रदेश मांय चूना-पत्थर रा 8 प्री-एम्बेडेड मेजर मिनरल ब्लॉक री ई-नीलामी सरू कर दीरीजी है। खान विभाग रा प्रमुख सचिव टी. रविकान्त बतायो के देश मांय ऐडो पहली दफा राजस्थान मांय व्हे रह्यो है। जोधपुर ज़िला री बिलाड़ा तहसील रा आं ब्लॉक सारू 7 नवंबर ने टेंडर जारी कर दिया ज्या है अर 12 दिसंबर ताई बोली लगायी जा सके है।

000

प्रदेश मांय 36 हजार किलोमीटर ऊं बत्ती सड़कां रो विकास करी ज्यो है। ई काम माथे करीब 25 हजार करोड़ रुपया रो खर्चो व्ह्यो है। ई सागे ई डोढ़ हजार ऊं बत्ता गांवां ने सड़कां ऊं जोड़ी ज्या है, जिण ऊं गांवाई हलकां ताई पहुंच आसान बणी है।

000

राष्ट्र गीत 'वंदे मातरम्' रा डोढ़ सौ साल पूरा व्हेवण रा सिलसिला मांय आज ई प्रदेश रा केई ज़िला मांय देशभक्ति रा कार्यक्रम राखी ज्या। सवाईमाधोपुर, पाली, राजसमंद अर डीग ज़िला मांय ज़िला कलेक्टर अर जनता रा नुमाइंदां री मौजूदगी मांय मोटरसाइकिल रैलियां अर 'एकता मार्च' निकाली ज्या।

राजसमंद मांय आज़ादी री लड़ाई मांय भाग लेवण वाळा 33 रणबांकुरां रा पिरवार वाळां रो मान करी ज्यो। झुंझुनूं मांय जनजागरूकता शृंखला रा तैत बी.डी.के. अस्पताल मांय खून दान शिविर लगायी ज्यो। ई मौके ज़िला कलेक्टर डॉ. अरुण गर्ग खून दान ने सब ऊं मोटो दान बतायो। बांसवाड़ा मांय मंत्री बाबूलाल खराड़ी मोटरसाइकिलां री प्रभात फेरी ने हरी झंडी बता र रवाना कीनी। ई मौके वे कह्यो के वंदे मातरम् गीत देश रा हर रहवासी सारु नाज़ करण वाळो गीत है।

000

चिकित्सा अर स्वास्थ्य मंत्री गजेंद्र सिंह खींवसर जैसलमेर मांय नुवा बणायी ज्या मेडिकल कॉलेज रो आज दौरा कर र व्यवस्थावां रो जायजो लीनो। ई मौके श्री खींवसर कह्यो के राज्य सरकार जनता री सेहत ने चोखी राखण माथे खास ध्यान देवण सारु लगातार काम कर रही है। वे कह्यो के जैसलमेर मेडिकल कॉलेज मांय 50 विद्यार्थियां रा पहला बैच री भण्णई बेगी ई सरु करी जावेला। खींवसर बतायो के कॉलेज परिसर मांय 345 बिस्तरां वाळा अस्पताल अर 50 बिस्तरां वाळी क्रिटिकल केयर यूनिट बणायी जा रही है।

000

बारां ज़िला री अंता विधानसभा सीट माथे उपचुणाव सारु 11 नवंबर ने पड़बा वाळा वोटां बाबत् प्रचार रो काम काल सिंज्यां खत्म व्हे जावेला। ई सारु भाजपा अर कांग्रेस समेत न्यारी-न्यारी पार्टियां रा नेता अर उम्मीदवार ज़ोर-शोर ऊं जनसम्पर्क कर रह्या है। भारतीय जनता पार्टी रा उम्मीदवार री हिमायत मांय मुख्यमंत्री भजन लाल शर्मा अर पैली वाळी मुख्यमंत्री वसुंधरा राजे रोड शो कर चुक्या है, जदके काल कृषि मंत्री डॉ. किरोड़ी लाल मीणा रो दौरा करण रो कार्यक्रम है। दूजी कानी कांग्रेस रा उम्मीदवार री हिमायत मांय राज्य रा पैली वाळा उपमुख्यमंत्री सचिन पायलट, प्रदेश कांग्रेस अध्यक्ष गोविन्द सिंह डोटसरा अर दूजा स्टार प्रचारक ज़ोर-शोर ऊं प्रचार कर रह्या है। निर्दलीय उम्मीदवार नरेश मीणा ई मुकाबला ने त्रिकोणीय बणा रह्या है। वां री हिमायत मांय आज राष्ट्रीय लोकतांत्रिक पार्टी रा नेता हनुमान बेनीवाल अर आम आदमी पार्टी रा नेता संजय सिंह जनसभा कीनी।

000

प्रदेश मांय वोटर लिस्टां रा विशेष गहन पुनरीक्षण अभियान रा तैत बूथ लेवल अहलकार घर-घर जा र गणना प्रपत्र दे रह्या है। झुंझुनूं ज़िला मांय हाल ताई करीब 3 लाख गणना प्रपत्र बांटी ज्या है। ज़िला निर्वाचन अधिकारी डॉ. अरुण गर्ग बतायो के गणना प्रपत्र देवण रा काम मांय करीब पौने दो हजार बीएलओ लाग्योड़ा है। वे जनता ऊं बी.एल.ओ. ने सही जाणकारी मुहैया करावण री अपील कीनी।

-----

भरतपुर रा ज़िला निर्वाचन अधिकारी कमर चौधरी वोटर लिस्टां ऊं मौजूदा मतदातावां री 90 फीसदी मैपिंग करावणो तैय कीनी है। ब्यावर मांय विशेष गहन पुनरीक्षण अभियान रा तैत ज़िला निर्वाचन अधिकारी कमल राम मीना मतदाता जागरूकता रैली ने हरी झंडी बता र रवाना कीनी। इण मांय एन. सी.सी. रा केडेट्स, एन.एस.एस., स्काउड गाइड अर विद्यार्थी शामिल व्ह्या।

000

प्रसार भारती रा चैयरमेन नवनीत कुमार सहगल कह्यो है के रेडियो सूचनावां रो मज़बूत अर आसान जरियो है। वे आज आकाशवाणी रा जयपुर केन्द्र मांय अहलकारां सागे समीक्षा बैठक मांय बोल रह्या हा। श्री सहगल कह्यो के रेडियो समाज रा न्यारा-न्यारा वर्गा ऊं जुडी प्रामाणिक जाणकारियां जनता ताई आसानी ऊं पूगा रह्यो है। वे कह्यो के आकाशवाणी ऊं प्रसारित कर्या जावण वाळा कार्यक्रम अब ओटीटी प्लेटफॉर्म वेब्स माथे ई सुण्या जा सके है।

-----

मीटिंग रे दौरान श्री सहगल अहलकारां ऊं आकाशवाणी जयपुर ऊं प्रसारित कर्या जा रह्या कार्यक्रमां अर राज्य मांय एफ.एम. ट्रांसमीटरां रा बारा मांय जाणकारी लीनी। वे समसामयिक अर जनता रा भला ऊं जुड़्या कार्यक्रमां रो प्रसारण बधावण रा हुकम दीना। प्रसार भारती रा चैयरमेन कार्यक्रमां री गुणवत्ता ने बेहतर बणावण अर आमदनी मांय बधोतरी माथे ज़ोर दीनो। ई मौके श्री सहगल आकाशवाणी परिसर मांय पौधो ई रोप्यो।

000

पाली ज़िला रा बालराई मांय घुमंतू, अर्द्ध-घुमंतू अर विमुक्त जातियां रा लोगां रा पड़ाव अर प्रदर्शन ने ध्यान राखता थकां जोधपुर री संभागीय आयुक्त प्रतिभा सिंह, जोधपुर रेंज रा पुलिस महानिरीक्षक राजेश मीना अर ज़िला कलेक्टर एल.एन. मंत्री मौके पूग्या।

आई.जी. मीणा कह्यो के हालात माथे निजर राख्यी जा रही है अर पुलिस गाड़ियां ने दूजा गेलां ऊं निकाळ रही है। वे बतायो के खास ठोड़ां माथे हिफाज़त सारु ज़रूरी तादाद मांय पुलिस रा जवान तैनात करी ज्या है।

000

श्रीगंगानगर मांय भर रह्या अश्व मेळा मांय चोखी नस्ल रा घोड़ा लाया जा रह्या है। आं घोड़ा रो मोल 70 हजार ऊं करीब 50 लाख रुपया बीचे है। 11 नवंबर ताई भरण वाळा ई मेळा मांय घोड़ां री दौड़ अर हॉर्स डिस्पले सरीखा कार्यक्रम राख्या जा रह्या है। मेळा मांय घोड़ां सागे ई नागौरी बळद, भैंसा अर परिंदा ई लाया जा रह्या है।

000